

壯猷公銘語

余一生闕歷茲已半生矣少年所作之事非多是寡今一一看破始知今是昨非回想當年不識事務常懷好勝勇敢之名奔波逐浪在家日少出外日多雖有一點英雄抱負要出人頭地然習俗移人未免有涉於嫖賭今始悔悟想人生在世無分賢愚苟能以嫖賭二字為戒以士農工商尋求為善做出定有好處終有結局藉非然者縱有英雄大志衣冠排場不

惟現被正人君子所鄙卽一身定有憂愁之日終無結局時矣吾今想到樂極生悲苦盡甘來敬刊於譜

爲子孫鑒戒

楊府錦盛先生大人傳

公字芳春號名園追溯生平樸實其身和柔其性起居不苟宗族奉爲儀型言行皆端鄉閭遵爲模範敦孝養則子職克供篤友恭則天顯克念而且教子課

孫和宗睦族燕翼貽謀箕裘丕振鴻猷啟後事業恢宏一生之懿行固筆難盡述也又況理通黃卷書習青鳥道達堪輿術精山水晚奉教從遊登山玩木亦旣金針盡度矣然哲人已遠雅範難忘迄今譜牒將成爰輯數語以致讚頌庶碩德重望厯千古而常新

楊母劉孺人傳語

蓋聞禮垂內則易著坤貞闡範承天懿美萃金閨之祉母儀配地光輝連寶婺之精翳維 孺人年方十
九弱子甫生夫君頓逝特立獨行爾時撫孤以期成立守節以厲聲名時勤紡績夜寐夙興幾經憂苦備歷
艱辛然積善之家必有餘慶懿德之後必有達人所幸天垂隻眼不負苦心晝莪教子含飴弄孫田園益闢
福祉頻臻迄今堂環四代壽越七旬名登天府

旌表及門共仰香閨之懿範長貽巾幗之芳型

祖母劉孺人實錄

蓋聞冰雪爲心栢舟作操古節婦之貞潔自矢原未

獲多觀聞吾祖母年僅十九而祖父去世父生纔越月餘斯時寂處繡幃獨守孤幃歷數十年如一日誠足徵操持之定也夫潛德原無欲發之光而堅貞自有獲報之理

光緒元年邑纂縣誌紳耆採訪舉報貞廉節孝荷蒙

聖朝優典

旌表加榮其寵渥固不可謂不厚矣以是思勵苦節於青年故得闡幽光於白首於此膺

皇天之眷顧卽於此見祖母之賢能也爰輯數語以昭示來茲云爾

光緒四年歲次戊寅仲秋月中澣穀旦

孫顯芬沐手敬書

楊府聘翁尊姊丈大人傳

從來砥行立名允作鄉邦之望家修廷獻得觀上國之光子姊丈諱清有號聘臣榜名凌雲為人樸實渾厚銳志芸憲好古窮經孳匕汲匕不爲他岐所惑不爲勢利所牽年逾四十吾姊以壯歲于歸歲在丙寅越戊辰有弄瓦之祥越庚午又有弄璋之慶以至年屆知非而泮水旋遊雲程發軔吾姊以挽鹿相夫丸熊教子將來之顯榮正未有艾值今續修族譜以姊丈力任其間上光前烈下裕後昆因思學裕才優曾聞鸞嘯預卜秋高春暖快覩鴻飛予忝列戚末不勝翹首企望之至

楊府尊岳父大人傳

公諱佑科字嗣登號聯卿壻自登臨以來得親雅範竊維從來不朽之業光昭天壤輝映後先聞 岳父生甫月零而 令先君大人頓逝克自樹立不染囂塵操持家務練達人情其處世公平不涉欺偽其居家儉樸不尚浮華卽壻時往時來常言務耕務讀莫不以輕薄相戒勤儉相勗今 岳父糾集房族倡修家乘哲嗣繼起析薪而負荷弗辭有賢內弟顯芬共爲贊勳越數月而譜事告竣於是本本源源脈絡貫通永垂不朽純純繼繼綱目條列錫類無窮由此族

誼旣聯家聲丕振允可稱為巨族焉